

四庫全書

集部

宋詩紀事原序

宋承五季衰敝後大興文教雅道克振其詩與唐在合  
離間而詩人之盛視唐且過之前明諸公剽擬唐人太  
甚凡遇宋人集槩置不問迄今流傳者僅數百家即名  
公鉅手亦多散逸無存江湖林藪之士誰復發其幽光  
者良可歎也予自乙巳後薄游邦溝嘗與汪君被江欲  
效計有功搜括而甄錄之會被江以事罷去遂中輟幸  
馬君嶰谷半槎兄弟相與商榷以為宋人詩考訂尚有

未當如胡元任不知鄭文寶仲賢為一人注蘇詩者不知歐陽闢非文忠之族方萬里不知薛道祖非昂之子以至阮閱休所紀三李定王伯厚所紀兩曹輔之類非博稽深訂烏能集事因訪求積卷兼之閱市借人厯二十年之久披覽既多頗加汰擇計所抄撮凡三千八百一十二家畧具出處大槩綴以評論本事咸著於編其於有宋知人論世之學不為無小補矣部帙既繁恐歸覆瓿念與二君用力之勤不忍棄去暇日釐為百卷目

曰宋詩紀事鏤板而傳之庶幾後之君子有以益我紕  
漏云時

乾隆十一年歲在柔兆攝提格陽月望樊榭厲鶚太鴻  
序



欽定四庫全書



卷一百一十五

欽定四庫全書

集部

宋詩紀事卷二

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱圻

謄錄監生臣陳昌敬

欽定四庫全書

宋詩紀事卷一

錢塘厲鶚撰

太祖皇帝

帝諱匡胤姓趙氏涿郡人仕周為殿前都點檢  
檢校太尉恭帝七年禪位於帝建元建隆乾德  
開寶在位十七年諡曰英武聖文神德皇帝廟  
號太祖葬永昌陵大中祥符元年加上尊諡曰  
啟運立極英武睿文神德聖功至明大孝皇帝

詠初日

太陽初出光赫赫千山萬山如火發一輪頃刻上天衢

逐退羣星與殘月

庚溪詩話上微時客有詠初日詩者語雖工而意則淺陋上所不喜其人請上詠之即應聲云云蓋本朝以火德王天下及上登極僭竊之國以次削平混一之志先形於言規模宏遠矣

句

未離海底千山墨纔到空中萬國明

後山詩話王師圍金陵唐使徐鉉來鉉伐其能欲以口舌解圍謂太祖不文盛稱其主博學多



藝有聖人之能使誦其詩曰秋月之篇天下傳誦之其句云云太祖大笑曰寒士語耳吾不道也鉉內不服謂大言無實可窮也以請殿上驚懼相目太祖曰微時自秦中歸道華下醉卧田間覺而月出有句云云鉉大驚殿上稱壽

## 太宗皇帝

帝諱炁初名匡乂改賜光義即位之二年改今諱太祖同母弟建元太平興國雍熙端拱淳化至道在位二十二年諡曰神功聖德文武皇帝廟號太宗葬永熙陵有御製集

欽定四庫全書

卷一

石林燕語太宗當天下無事留意藝文而琴棋亦皆造極品時從臣應制賦詩皆用險韻往往不能成篇而賜兩制棋勢亦多莫究所以故不得已則相率上表乞免和訴不曉而已王元之嘗有詩云分題宣險韻翻勢得仙棋又云恨無才應副空有表虔祈蓋當時事也

玉海祥符五年八月丁巳龍圖閣學士陳彭年表上奉詔編錄太宗御集四十卷君臣賡載集三十卷朱邸集十卷文明政化十卷祕藏銓十卷蓮花偈逍遙詠金剛經疏禪樞要緣識至理篇回文詩心輪圖共五十五卷九絃琴譜二十卷五絃阮譜十七卷棋勢圖譜各一卷詔奉安于太清樓資政殿崇文院祕閣西京三館各一本御撰文字總十八部合二百四十卷十一月丙辰出新編太宗御製文集及御書法帖目一卷凡十五部總三百三十六卷以示輔臣曰先

帝嗜學實由天縱屬思援翰必極精妙朕孜孜  
尋訪文詞筆札殆無遺逸

### 賜陳搏

曾向前朝號白雲後來消息杳無聞如今若肯隨徵召

### 總把三峯乞與君

澠水燕談陳搏周世宗常召見賜號白雲先生  
太平興國初召赴闕太宗賜御詩先生服華陽  
巾草履垂緇以賓禮見賜坐上方欲征河東先  
生諫止會軍已興令寢御園百餘日方起兵還  
果無功恩禮特異賜號希夷

### 太平興國七年季冬大雪賜學士

輕輕相亞凝如酥宮樹花裝萬萬株今賜酒卿時一盞

玉堂閒話道情無

孔平仲談苑

句

鑾輿臨紫塞朔野凍雲飛

北征途中御製

皇朝類苑

珍重老臣純不已我慙寡昧繼三皇

庚溪詩話宰相李昉罷政家居每宴必宣赴坐  
昉獻詩曰微臣自魏頭如雪也向鈞天侍玉皇  
上俯和云云時皆榮之

欲餌金鉤殊未達磻溪須問釣魚人

庚溪詩話呂端參知政事上一日幸後苑釣魚  
賜之詩云云端賡以進曰愚臣鉤直難堪用宜  
問濠梁結網人既而端遂拜相

### 真宗皇帝

帝諱恒太宗第三子建元咸平景德大中祥符  
天禧乾興在位二十六年葬永定陵諡曰文明  
武定章聖元孝皇帝廟號真宗慶厯七年加諡  
膺符稽古神功讓德文明武定章聖元孝皇帝  
有御製集



庚溪詩話真宗皇帝聽斷之暇唯務觀書每觀一書畢即有篇詠命近臣賡和可謂好文之主也

玉海天禧四年十一月壬戌詔丁謂等作天章閣奉安御集五年三月戊戌閣成庚子令具兩街僧道威儀教坊作樂奉御集御書自玉清昭應宮安于天章閣羣臣稱賀賜宴時輔臣編御集為三百卷頌銘碑文十八卷贊八卷詩三十卷七卷賜中宮詩七卷賜太子歌詩箴述五卷龍圖閣歌詩四卷水殿詩一卷清景殿詩二卷西園詩三卷三教詩九卷讀經史詩四卷維城集三卷奉道詩十卷歲時新詠十卷樂章一卷樂府集并新詞五卷論述十卷序八卷箴七條各一卷記六卷又三卷又一卷書十卷正說十卷承華要畧二十卷靜居集三卷玉宸集五卷法音前集七卷春秋要言五卷試進士題一卷密

表密詞六十九卷玉京集二十卷至道元年訖  
大中祥符聖政紀凡一百五十卷並鏤版又以  
御書石本為九十編命中使岑守素主其事至  
是畢功焉

### 賜楊億判祕監

瑣闥往年司制誥共嘉藻思類相如蓬山今日詮墳史  
還仰多聞過仲舒報政列城歸覲後疏恩高閣拜官初  
諸生濟濟彌瞻望鉛槧諮詢辨魯魚

石林燕語

### 賜神童蔡伯俸

七閩山水多才俊三歲奇童出盛時家世應傳清白訓

嬰兒自得老成姿初當移步來朝謁方及能言便誦詩  
更勵孜孜圖進益青雲千里看前期

揮塵後錄伯侑字景蕃與晏元獻俱五六歲以  
神童侍仁宗于東宮元獻自初梗介蔡最柔媚  
每太子過門闌高者蔡伏地令太子履其背而  
登既踐阼元獻被知遇至宰相蔡竟不大用以  
舊恩常領郡頗不循法令或被劾取旨上識其  
姓名必曰藩邸舊臣且令轉官凡更四朝元符  
初致仕已八十歲矣監司薦之乞落致仕與宮  
祠其辭畧云蔡伯侑年八十歲食祿七十五年  
余謂人生名位固可得罕得綿長如此者

賜蘇州節度使丁謂并序



卿黃閣同寅實彰於盡瘁碧幢臨鎮方屬於報功言  
當入謝之辰特賜褒賢之作今成七言四韻詩一首  
賜新授蘇州節度使丁謂依韻和進

懿辭碩畫播朝中造膝詢謀禮遇豐文石延登彰順美  
高才前導表疇庸書生仗鉞今尤貴舊里分符古罕逢  
畫錦買臣安敢比黃樞早日接從容

又賜丁謂

并序

卿名藩出蒞雖極於倚毗文陛言辭良多於眷注特

示寵行之什用增方面之榮今成五言十韻詩一首  
賜蘇州節度使丁謂依韻和進

踐歷功皆著諮詢務必成懿才符曩彥佳器貫時英俾  
展經綸業旋陞輔弼榮嘉亨忻盛遇盡瘁罄純誠均逸  
明恩洽酬勞茂典行白麻三殿曉紅旆九衢平雖輟凝  
嚴任尤增倚注情擁旄辭帝闕頓轡望都城風景高秋  
月烟波幾舍程想卿懷感意常是夢神京

以上吳郡志

天禧三年賜尚書左僕射兼中書門下平章事王

欽若除太子太保判杭州十韻

早自外朝登近侍，克符昌運振嘉名。  
一參黃閣推良畫，再陟鴻樞顯至榮。  
該博古今常獻納，勤勞夙夜每專精。  
石渠撰述多文備，日觀封崇大禮成。  
宰府調元心匪懈，真宮兼職望彌清。  
龍樓進秩恩尤異，熊軾為藩任不輕。  
二浙輿區期惠化，三吳佳致悅高情。  
重重山水舟中見，處處壺漿陌上迎。  
既肅邇遐安外域，更分宵旰撫黎氓。  
予衷側席方毗倚，佇有甘棠播頌聲。

乾道臨安志

賜知貢舉學士晁迥

大中祥符五年正月癸酉

盛時選士貢闈開聲宇聞風獻藝來必以權衡求實效

勿令蓬華有遺才

金坡遺事

海棠

春律行將半繁枝忽競芳霏霏含宿霧灼灼豔朝陽戲  
蝶棲輕蕊遊蜂逐遠香物華留賦詠非獨務雕章

海崇譜

仁宗皇帝

帝諱貞初名受益真宗第六子建元天聖明道

景祐康定寶元慶厯皇祐至和嘉祐在位四十二年諡曰神文聖武明孝皇帝葬永昭陵有御

製集

玉海治平元年五月丁未命天章閣待制呂公著修起居注卽必編集仁宗御製二年十月甲寅編成一百卷以進詔藏于寶文閣英宗製序曰敎禋祀饗升歌樂章藏于有司薦于郊廟者多矣而登臨遊賞之適割鮮獻獲之樂前世所誇者未始一及焉萬幾之暇泊然凝神不見所好惟躬閱寶訓陳經邁英究鍾律之本元訓師兵之武畧披圖以監古銘物以自戒從事于清閒宴息之餘者不過此類嗚呼大禹之勤儉也永惟聖作鏤之玉版藏之金匱以垂無窮俾知

我聖考之所以為仁者自勤儉始

幸後苑召宰執侍從臺諫館閣以下賞花釣魚中

觴賦詩

晴旭暉暉苑籞開  
氤氲花氣好風來  
遊絲罨絮紫行仗  
墮藥飄香入酒杯  
魚躍紋波時潑刺  
鸞流深樹久徘徊  
青春朝野方無事  
故許歡遊近侍陪

閒居詩話章聖朝春月多名兩府兩制三館于  
後苑賞花釣魚賦詩自元昊背叛西陲用兵廢  
缺甚久嘉祐末仁宗修故事韓魏公和御製詩  
卒章云曾參二十年前會今備台司得再陪時

內侍都知任守忠以滑稽侍上從容曰韓琦譏陛下仁宗愕然問故守忠曰譏陛下遊宴太頻

仁宗為之笑

蘇魏公語錄仁宗賞花釣魚賜宴詩執政諸公暨禁從館閣皆屬和而徘徊二字無他義諸公進和篇皆押徘徊再坐教坊雜戲為數人尋訪稅第至一宅入觀之至前堂之後問所以曰徘徊又至後堂東西序亦問之皆曰徘徊也一人笑曰可則可矣徘徊太多

### 賜梅摯知杭州

地有吳山美東南第一州  
剖符宣政化持橐輟才流  
暫出論思列遙分旰晷憂  
循良勤撫俗來暮聽歌謳

庚溪詩話嘉祐初龍圖閣學士尚書吏部郎中梅摯公儀出守杭州上特製詩以寵賜之梅既到杭欲侈上賜遂建堂吳山上名曰有美歐陽修為記

句

寒儒逢景運報國合如何

庚溪詩話仁宗皇帝景祐元年聞喜宴賜進士詩末句云云言宏大而有激勵真詔旨也

恩袍草色動仙籍桂香浮

庚溪詩話瓊管夷人有持錦臂鞬鬻於市者其上織成詩一聯云云乃景祐五年賜進士詩也山東李廷臣以千金易之作小屏几硯閒見之者莫不改容瞻敬



神宗皇帝

帝諱頊英宗長子建元熙寧元豐在位十八年  
諡曰英文烈武聖孝皇帝廟號神宗葬永裕陵  
有御製集

秦國大長公主挽詞二首

曉發城西道靈車望更遙春風空魯館明月斷秦簫塵  
入羅衣暗香隨玉篆銷芳魂飛北渚那復可為招

慶自天源發恩從國愛申歌鐘雖在館桃李不成春水

折空還沁樓高已隔秦區區會稽市無復獻珠人

冷齋夜話元豐初魏泰載之于詩話中雖黃竹  
大風之詞莫可擬其髣髴噫豈特前代帝王蓋  
古今詞章之工者無此作也

徽宗皇帝

帝諱佖神宗第十一子建元建中靖國崇寧大觀  
政和重和宣和七年內禪皇太子尊帝為教  
主道君太上皇帝靖康二年北狩紹興五年崩於  
五國城七年凶問至江南遙上尊諡曰聖文仁德

顯孝皇帝廟號徽宗十二年梓宮還臨安權橫永  
祐陵十三年加上尊號曰體神合道駿烈遜功聖

文仁德憲慈顯孝皇帝有崇觀宸奎集御製集

避暑錄話政和間大臣有不能為詩者因建言  
詩為元祐學術不可行何丞相伯通適領修敕  
令因為科云諸士庶傳習詩賦者杖一百是歲  
冬初雪太上皇甚喜吳門下居厚作詩三篇以  
獻謂之口號上和賜之自是聖作時出訖不能  
禁詩遂盛行于宣和之末

己亥十一月十三日南郊祭天齋宮即事賜太師

報本精裡自國南先期清廟宿齋嚴層霄初擴同雲霽

暖吹俄回海日遲十萬軍容冰作陣九街鴛瓦玉為簷  
肅雍顯相同元老行慶均釐四海霑

清廟齋幄嘗有詩賜太師已曾和進裡祀禮成以  
目擊之事依前韻再進今亦用元韻復賜太師非  
特以此相困蓋清時君臣賡載亦一時盛事耳

靈鼓黃麾道指南紫壇蒼壁示凝嚴聯翩玉羽層霄下  
烜赫神光愛景暹為喜鸞輿回鳳闕故留芝蓋出蚪簷  
禮天要作斯民福解雨今當萬國霑

太師以被賜暹字韻詩前後凡三次進和蓋欲示其韻愈嚴而愈工耳復以前韻又賜太師

天位迎陽轉斗南千官山立盡恭嚴共欣奠玉烟初達爭奉回鸞日已暹歸問雪中誰詠絮冥搜花底自巡簷禮成

卻喜歌盈尺端為來麤萬寓霑

原注唐杜甫詩巡簷索共梅花笑蓋雪事也

上清寶籙宮立冬日講經之次有羽鶴數千飛翔空際公卿士庶衆目仰瞻卿時預榮觀作詩紀實來上因俯同其韻賜太師以下

上清講席鬱蕭臺俄有青田萬侶來蔽翳晴空疑雪舞  
低回轉影類雲開翻翰清唳遙相續應瑞凝時尚不回  
歸美一章歌盛事喜今重見謫仙才

以上揮塵餘話

賜燕帥王安中荔枝

保和殿下荔枝丹文武衣冠被百蠻思與廷臣同此味  
紅塵飛輭過燕山

老學菴筆記

宮詞

佑神珍觀五雲開高倚層霄疊玉臺笑語半空知遠近

縱觀飛騎拂塵來

玉鉤紅綬挂琵琶七寶輕明撥更嘉捍面折枝新御畫  
打弦惟恐損珍花

湘簾涼生暑氣微午天敲枕向紗幃  
轆轤車扇閒闌處  
雙月迴廊彩鳳飛

苑西廊畔碧溝長修竹森森綠彩涼  
戲擲水毬爭遠近  
流星一點耀波光

清晨簷際肅霜鮮曉日初銷萬瓦烟  
隆德重陽開小宴

競將黃菊作花鈿

今歲閩中別貢茶翔龍萬壽占春芽初開寶篋新香滿

分賜師垣政府家宣和御製宮詞

趙昌江梅山茶

趙昌下筆摘韶光一軸黃金滿斗量借我圭田三百畝

真須買取作花王中興館閣續錄

賦擊毬

錦裘駿馬曉棚分一點星馳百騎奔奪得頭籌須正過



休令綽撥入斜門

三朝北盟會編徽宗北狩至真定金人高會擊毬請帝賦詩云綽撥斜門皆打毬家語也

汧州作

投袂汧城北西風又是秋中原心耿耿南渡思悠悠嘗

膽期賢佐顯情憶舊遊故宮禾黍徧行役閔宗周

雪舟勝語

在北題壁

徹夜西風撼破扉蕭條孤館一燈微家山回首三千里

目斷天南無雁飛

山房隨筆

題修竹士女圖

瑤臺無信託青鸞一寸芳心思萬端  
莫向東風倚修竹翠衫經得幾多寒

題芭蕉士女圖

羅襪生香踏軟莎釵橫玉熱鬢鬆鴉  
春心正是芭蕉葉羞見宜男並蒂花

題滌硯士女圖

軟繡屏風小象牀細風亭館玉肌涼  
含情學寫鴛鴦字

墨洗蕉花露水香

題團扇士女圖

濃黛消香淡兩蛾  
花陰試步學凌波  
專房自得傾城色  
不怕涼風到扇羅

以上郁氏書畫題跋記

高宗皇帝

帝諱構字德基徽宗第九子宣和三年封康王  
靖康元年使金見留得還勤王兵奉帝至應天  
府元祐皇后詔帝即位建元建炎紹興紹興元

年移蹕臨安府是為行都三十二年内禪皇太子  
尊為太上皇帝累上尊號曰光堯壽聖憲天體道  
性仁誠德經武緯文紹業興統明謨盛烈太上皇  
帝淳熙十四年崩諡曰聖神武文憲皇帝廟號高  
宗攢會稽永思陵紹熙二年加諡受命中興全  
功至德聖神武文昭仁憲孝皇帝有御製集

庚溪詩話光堯壽聖太上皇帝當內修外攘之  
際尤以文德服遠至于宸章睿藻日星昭垂者  
非一至紹興二十八年將郊祀有司以太常樂  
章篇序失次請遵真宗仁宗故事親製詔從之

自郊丘宗廟原廟等共十有四章肆筆而成睿  
思雅正宸文典贍所謂大哉王言也

中和堂詩

并序

孟夏壬戌來登斯堂遠矚稽山思夏后之功俯瞰濤  
江懷子胥之烈賦古詩一首

六龍轉淮海萬騎臨吳津王者本無外駕言蘇遠民瞻  
彼草木秀感此瘡痍新登堂望稽山懷哉夏禹勤神功  
既盛大後世蒙其仁願同越句踐焦思先吾身艱難務  
遵養聖賢有屈伸高風動君子屬意種蠡臣

淨明院易安齋梅巖詩

并序

款謁泰壇因過易安齋愛其去城不遠巖谷幽邃得  
天成自然之趣為賦梅巖云

怪石蒼巖映翠霞梅梢疎瘦正橫斜得因祀事來尋勝  
試探春風第一花

以上咸淳臨安志

漁父詞

青草開時已過船錦鱗躍處浪痕圓竹葉酒柳花蘊有  
意沙鷗傷我眠

扁舟小纜蘆花風四合青山暮靄中  
明細火倚孤松但願尊中酒不空

薄晚烟林淡翠微江邊秋月已明輝  
縱遠柁適天機水底閒雲片段飛

雪灑清江江上船一錢何有買江天  
催短棹去長川魚蟹來傾酒舍烟

水涵微雨湛虛明小笠青蓑未要晴  
明鑑裏縠紋生白鷺飛來空外聲

庚溪詩話 云清新簡遠備騷雅之體

題紅木犀花扇賜從臣

月宮移就日宮裁  
引得輕紅入面來  
好向烟霄承雨露  
丹心一點為君開

秋入幽叢桂影團  
香深粟粟照林丹  
應隨王母瑤池宴  
染得朝霞下廣寒

陳郁話腴明之象山士子史本有木犀忽變紅色異香因接本獻闕下高廟雅愛之畫為扇面仍製詩以賜從臣自是四方爭傳其本歲接數百史氏由此昌焉



題黃筌芙蓉

照水枝枝蜀錦囊  
年年澤國為誰芳  
朱顏自得西風意  
不管千林一夜霜

題修竹芙蓉

寒花婀娜露凝香  
風葉搖秋鳳尾涼  
夢入畫堂銀燭下  
翠屏深處隱紅妝

以上郁氏書畫題跋記

句

白雲斷處斜陽轉  
幾曲青山獻畫屏

題蕭照畫  
補遺

書畫

孝宗皇帝

帝諱昀字元永太祖七世孫秦王德芳之後秀  
王偁子高宗育于宮中立為皇太子受內禪建  
元隆興乾道淳熙淳熙十六年禪位皇太子上  
尊號曰至尊壽皇聖帝紹熙五年崩諡曰哲文  
神武成孝皇帝廟號孝宗攢永阜陵慶元三年  
加諡紹統同道冠德昭功哲文神武明聖成孝  
皇帝有御製集

名史浩錫宴澄碧殿俯同其韻

揖遜荷帝堯寅恭五元禋治道貴清靜聖言有深旨誰  
歌元首明自得股肱喜躋民期仁壽詎肯中道止力農  
樂彼田坐賈安於市歲行閱豐登國輸銷委靡予力初  
何能濟濟賴多士矧予有元老中立而不倚居東逾三  
年不遠來千里未遂赤松遊輟誦青琅藥皓首持六經  
日侍明光裏翼乎鴻遇風縱矣魚在水儒行絕瑕疵道  
心無塵滓挺挺松栢姿巉巖山岳峙予惟日萬幾至仁

同一視西成錫小宴促坐才尺咫湛露魏歌周置酒非  
封齒歸美見新詩如卿能有幾眷言澄碧行勝賞得迂  
趾亦屢引公卿對此談政理虛心欲受人忠言資逆耳  
朕瘠天下肥至樂無易此頗念文武疆六合尚殊軌東  
都會諸侯宣王昔于是期爾罄嘉謀使我勲業起勿以  
方燕頤所書聊復爾卮酒正須醕話言未能已都護萬  
年觴何當至庭祀文章藉老手直筆中興紀載嘉矍鑠  
翁焉得辭骹骹

玉堂雜記

比幸玉津園縱觀春事適霽色可喜洪邁有詩來  
上因俯同其韻

春郊柔綠徧桑麻小駐芳園覽物華應信吾心非暇逸  
頓回晴意絕咨嗟每思富庶將同樂敢務遊畋漫自誇  
不似華清當日事五家車騎爛如花

容齋五筆

秋日臨幸祕書省因成近體詩一首賜丞相史浩  
以下

玉軸牙籤煥寶章簪紳侍列映秋光宴開芸閣儒風盛

坐對蓬山逸興長稽古右文慚菲德禮賢下士法前王  
欲臻至治觀熙洽更罄嘉謀為贊襄

咸淳臨安志

和御製梅巖

秀色環亭擁霽霞修筠冰豔數枝斜東君欲奉天顏喜  
故遣融和放早花

四朝聞見錄光堯親祀南郊因過易安齋為賦  
梅巖孝宗和詩云云

芙蓉閣觀擊毬賜宴選德殿

昊穹垂佑福羣生涼德惟知監守成禾黍三登占叶氣

簫韶九奏播歡聲  
未央秋晚林塘靜  
太液波閒殿閣明  
嘉與臣鄰同燕樂  
益修庶政答丕平

武林舊事

### 冷泉堂詩

山中秀色何佳哉  
一峯獨立名飛來  
參差翠麓儼如畫  
石骨蒼潤神所開  
忽聞想像來宮園  
指顧已驚成列岫  
規模絕似靈隱前  
面勢恍疑天竺後  
孰云人力非自然  
千巖萬壑藏雲烟  
上有崢嶸倚空之  
翠壁下有潺湲漱  
玉之飛泉  
一堂虛敞臨清沼  
密蔭交加森羽葆  
山頭草

木四時春閱盡歲寒長不老聖心仁智情優閒壺中天  
地非人間蓬萊方丈渺空闊豈若坐對三神山日長雅  
趣超塵俗散步逍遙快心目山光水色無盡時長將挹  
向杯中淥

武林舊事光堯雅愛湖山之勝恐數蹕煩民鑿  
大池于北宮內引水注之疊石為山象飛來峯  
有堂名冷泉孝宗皇帝賦詩云云

新晴雨過述懷

平生雄武心覽鏡朱顏在豈惜常憂勤規恢須廣大



春晴有感

春風歸草木曉日麗山河物滯欣逢泰時豐自此多神  
州應未遠當繼沛中歌

庚溪詩話今上皇帝躬受內禪踐阼以來未嘗  
一日暫忘中興之圖每形于詩詞云云觀此則  
規恢之志大矣

賜虞允文再撫西蜀

一德如公豈合閒聊分西面欲憂寬不辭論道虛台席  
暫假宣威築將壇風教已興三蜀靜干戈再戢萬方安

歸來尚想終霖雨未許鄉人衣錦看

翠屏筆談

賜僧守璋

古寺春山青更妍長松修竹翠含烟汲泉擬欲增茶興

暫就僧房借榻眠

西湖遊覽志

題刁光引畫冊

乾道元年

一枝殘雪照山城春意原非復後生羞把紅顏媚兒女  
梅兄知我歲寒情

黃冠翠帔玉為姿何處春風一見之未到湘江清絕地

試看山谷老人詩

式古堂畫考

光宗皇帝

帝諱惇孝宗第三子受內禪建元紹熙在位五年禪位皇子嘉王慶元元年上尊號曰聖安壽仁太上皇帝慶元六年崩諡曰憲仁聖哲慈孝皇帝廟號光宗嘉泰三年加諡循道憲仁明功茂德溫文順武聖哲慈孝皇帝有御製集

恭和聖製新秋雨過述懷

中興日月明王氣山河在萬物飾昭回稽首王言大

庚溪

詩話

會僚屬賞海棠偶有題詠

為太子時尹臨安府作

濃淡名花產蜀鄉半含風露浥新妝嬌嬈不減舊時態  
誰與丹青為發揚

海棠

東風用意施顏色豔麗偏宜著雨時朝詠暮吟看不足

羨他逸蝶宿深枝

以上海棠譜

題楊補之紅梅圖賜貴妃

去年枝上見紅芳約畧紅葩傳淺妝今日亭中足顏色

可能無意謝東皇

式古堂畫考

理宗皇帝

帝諱昀太祖十三世孫榮王希璠子初嗣沂王

寧宗違豫立為皇子即位建元寶慶紹定端平

嘉熙淳祐寶祐開慶景定在位四十年葬永穆

陵諡曰建道備德大功復興烈文仁武聖明安

孝皇帝廟號理宗

淳祐丙午講禮記畢錫宴祕書省賜侍讀少師鄭清之以下

鼇極開先已降衷上天下澤禮居中三才義理維持力  
萬世綱常建立功孔聖法言多纂輯漢儒師學共修崇  
經帷講徹資羣彥克已工夫在廣克

後村詩話

重修復古殿紀事詩

高宗建理宗重修

烈祖謀詒燕沖人命紹龜禁嚴瞻復古締創想當時鳳

紀因多歷翬飛欲寢隳端居常念此涼德恐羞之勉輯  
炎興業新還舜禹規棟驤非玉瑱樸斲僅塗茨咫尺羹  
牆見延洪典則貽緬懷先宅舊儼若煥章垂聖志惟先  
定鴻名寓有為風烟沈廟算天日俯疇咨屏翰環方名  
言謨富禹夔權綱歸總攬制度永維持養士翔鴛鷺蒐  
兵振虎貔宣王修政日光武中興時文治綏函夏英威  
邇遠夷萬年丕顯績三紀太平基繼述慙非稱規恢動  
慨思肯堂心翼翼景行日孜孜載繹車攻雅宜賡考室

詩告成書梗概拜手緝蕪辭

咸淳臨安志

聞喜宴詩賜狀元方逢辰

肆予臨御九賓興藹藹盈庭俊又升  
喜賴讜言調八事  
欲垂景運進三登  
攄忠社稷惟名節  
濟用邦家必器能  
豐芑涵濡盛今日  
勉思德意共欽承

青溪詩集

寧宗皇帝挽詞

冲澹凝金汞憂勤失寶丹  
講餘曦正午班促漏方殘  
濟野雲生暗蒼梧日轉寒  
列朝從藝祖天闕會金鑾



仙御賓空日龍飛杳杳閒五雲呈瑞綵九虎啟重關寶  
輦扶蒼鶴雲韶擁玉班千年棲佛地今日覩天顏

淵鑑

類函

### 度宗皇帝

帝諱禔理宗母弟嗣榮王與芮之子理宗立為  
皇太子即位建元咸淳在位十年諡曰端文明  
武景孝皇帝廟號度宗葬永紹陵

### 御製晚望

鷗鷺歸烟渚秋江挾晚晴老漁閒樣艇坐待月華生

隨隱

漫錄

瀛國公

公名黷度宗子咸淳十年即位建元德祐二年  
元兵入臨安朝於上都降封開府儀同三司瀛  
國公

在燕京作

寄語林和靖梅花幾度開黃金臺下客應是不歸來

輟耕錄始終二十字含蓄無限淒戚意思讀之而不興感者幾希

### 鸚鵡

毛羽自然可數仙禽不受凡籠銜得梧桐一葉中含無

限秋風

乾坤清氣

### 憲聖慈烈吳皇后

后開封人高宗為康王被選入宮即位封和義  
郡夫人進封才人紹興十三年立為皇后孝宗  
即位上尊號曰壽聖太上皇后光宗即位尊為

隆慈備福太皇太后寧宗即位加號光祐慶元三年崩諡曰憲聖慈烈攢附永思陵

四朝聞見錄高宗憲聖吳后侍高宗航海金騎猝至欲挈御舟后發一矢應弦而倒高宗重于視師后奏曰若臣妾裹尺五阜紗須一往矣書史會要憲聖慈烈皇后博習書史妙於翰墨帝常書六經賜國子監刊石稍倦即命后續書人莫能辨

題徐熙芍藥

穠李天桃掃地無眼明驚見玉盤盂揚州試識春風面

看盡羣花總不如

韻石齋筆談

恭聖仁烈楊皇后

后少選入宮忘其姓氏或云會稽人寧宗慶元  
元年封平樂郡夫人進封婕妤以楊次山為兄  
遂姓楊氏進婉儀六年進貴妃立為皇后理宗  
即位上尊號曰壽明慈睿皇太后寶慶五年崩  
諡曰恭聖仁烈

題朱銳雪景冊賜大少保

風吹醉面不知寒信腳千山與萬山天甃瓊街三十里

更飛柳絮與君看

郁氏書畫題跋記

宮詞

瑞日瞳瞳散曉紅  
乾元萬國佩丁東  
紫宸北使班纔退  
百辟同趨德壽宮

元宵時節賞宮梅  
恭請光堯壽聖來  
醉裏君王扶上輦  
鑾輿半仗點燈回

溶溶太液碧波翻  
雲外樓臺日月閒  
春到漢宮三十六  
為分和氣到人間

上林花木正芳菲  
內裏爭傳御製詞  
春賦新翻入宮調  
美人羣唱捧瑤卮

後院深沈景物幽  
奇花名竹弄春柔  
翠華經歲無遊幸  
多少亭臺廢不修

天中聖節禮非常  
躬率羣臣上壽觴  
天子捧盤仍再拜  
侍中宣達近龍牀

水殿鉤簾四面風  
荷花簇錦照人紅  
吾王一曲薰弦罷  
萬俗泠泠解愠中

宮殿鉤簾看水晶時當三伏熾炎蒸翰林學士知誰直  
今日傳宣與賜冰

雲影低涵百子池秋聲輕度萬年枝要知玉宇涼多少  
正在觀書乙夜時

涼秋結束鬪鮮新宣入毬場尚未明一朶紅雲黃蓋底  
千官下馬起居身

秋高風勁角弓鳴臂健常嫌斗力輕玉陛纔傳看御箭  
中心雙中謝恩聲



用人論理見宸衷賞罰刑威合至公天下監司二千石  
姓名都在御屏中

家傳筆法學先堯聖草真行說兩朝天縱自然成一體  
謾誇虎卧與龍跳

泛索坤寧日一羊自從正位挫詞章好生躬儉超千古  
風化宮嬪只淡妝

擊鞠由來豈作嬉不忘鞍馬是神機牽韁絕尾施新巧  
背打星毬一點飛

角黍冰盤餽釘裝酒闌唱歇泛瑤觴近臣誇賜金書扇  
御侍爭傳佩帶香

一朶榴花插鬢鴉君王長得笑時誇內家衫子新番出  
淺色新裁艾虎紗

簾幙深深四面垂清和天氣漏聲遲宮中閣裏催繅繅  
要趁新蠶作五絲

小樣盤龍集翠裘金羈緩控五花騮繡旂開處鈞天奏

御棒先過第一籌

楊后宮詞

鄆王楷

王徽宗第三子始封魏國公進高密郡王嘉王  
政和八年廷策進士唱名第一母王妃方有寵  
遂超拜太傅改王鄆仍提舉皇城司欽宗立改  
鎮鳳翔彰德軍靖康初與諸王北遷

清波雜志王黼奉敕撰明節和文貴妃墓志云  
六宮稱之曰韻時以婦人有標致者為韻曾叩  
于故老宣和間衣曰韻顯果曰韻梅曲曰韻令  
乃梁師成為鄆邸倡此識時趙野春帖子亦有  
復道密通蕃衍宅諸王誰似鄆王賢亦迎合之  
意也

蔡絛北狩行錄太上雖在蒙塵不忘義方之訓  
每下程後諸王問安必留坐賦詩屬對太上曰  
方當月白風清夜鄴王指對曰正是霜高木落  
時太上曰落花滿地春光晚莘王植對曰芳草  
連雲暮色深皆類此

覽夢得所藏李伯時畫吳中三賢因各書絕句

已將勲業等浮漚鳥盡弓藏見遠謀越國江山留不住

五湖風月一扁舟

范蠡

西風淅淅動高梧目送浮雲悟卷舒自是歸心感秋色

不應高興為鱸魚

張翰

杞菊蕭條繞屋春不教鵝鴨惱比鄰  
滿身花影猶沈醉

真是江湖一散人

陸龜蒙

珊瑚網

宋詩紀事卷一

欽定四庫全書

宋詩紀事卷二

錢塘厲鶚撰

范質

質字文素大名宗城人後唐長興四年進士晉  
天福中為翰林學士周廣順初拜中書侍郎同  
中書門下平章事太祖受禪加兼侍中乾德初  
封魯國公三年罷為太子太傅卒有集

聞見前錄魯公舉進士和凝為主文愛其文賦  
擬自以第十三登第謂魯公曰君之文宜冠多

士屈居十三者欲君傳老夫衣鉢耳魯公以為榮至先後為相有獻詩者云從此廟堂添故事登庸衣鉢亦相傳周祖舉兵向闕京師亂魯公隱於民間一日坐封丘巷茶肆中有人貌怪陋前揖曰相公無慮時暑中公所執扇偶書大暑去酷吏清風來故人詩二句其人曰世之酷吏冤獄何止如大暑也公他日當深究此弊因攜其扇去公惘然久之後至祆廟見一土偶短鬼貌肖茶肆見者扇亦在其手中公心異焉

誠兒姪八百字

昨得謝課書希於京秩之中更與遷轉余以諸兒姪輩生長以來未諳外事艱難損益懵然莫辨因抒古詩



一章曉之

去年初釋褐一命到蓬丘

自注謂謝課

青袍春草色白紵棄

如仇適會龍飛慶王澤天下流爾得六品階無乃太為  
優凡登進士第四選升校讐歷官十五考敘階與爾儔  
如何志未滿意欲凌雲遊若言品位卑寄書來我求省  
之再三歎不覺淚盈眸吾家本寒素門地寡公侯先子  
有令德樂道尚優游生逢世多僻委任信沈浮仕宦不  
喜達吏隱同莊周積善有餘慶清白為貽謀伊余奉家

訓孜孜務進修夙夜事勤肅言行思悔尤出門擇交友  
防慎畏薰猶省躬常懼玷恐掇庭闈羞童年志於學不  
情為箕裘二十中甲科頰尾化為虬

自注二十三進士  
及第今舉成數

三十八翰苑步武向瀛州四十登宰輔貂冠侍冕旒備  
位行一紀將何助帝猷既非救旱雨豈是濟川舟天子  
未遐棄日益素餐憂黃河潤千里草木皆浸漬吾宗凡  
九人繼踵昇官次門內無白丁森森朱綠紫鵷行洎內  
職亞尹州從事府掾監省官高低皆清美悉由僥倖升

不因資考至朝廷懸爵秩命之曰公器才者祿及身功  
者賞於世非才及非功安得霑厚利寒衣內府帛飢食  
太倉米不蠶復不穡未嘗勤四體雖然一家榮豈塞衆  
人議顥顥十目窺齷齷千人指借問爾與吾如何不自  
媿戒爾學立身莫若先孝弟怡怡奉親長不敢生驕易  
戰戰復兢兢造次必於是戒爾學干祿莫若勤道藝嘗  
聞諸格言學而優則仕不患人不知惟患學不至戒爾  
遠恥辱恭則近乎禮自卑而尊人先彼而後己相鼠與

茅鴟宜鑒詩人刺

自注左傳茅鴟刺不恭也

戒爾勿曠放曠放非端

士周孔垂名教齊梁尚清議南朝稱八達千載穢青史  
戒爾勿嗜酒狂藥非佳味能移謹厚性化為凶暴類古  
今傾敗者歷歷皆可記戒爾勿多言多言衆所忌苟不  
慎樞機災危從此始是非毀譽閒適足為身累舉世重  
交遊擬結金蘭契忿怨從是生風波當時起所以君子  
心汪汪淡如水舉世好承奉昂昂增意氣不知承奉者  
以爾為玩戲所以古人疾蘧篳與戚施舉世重任俠俗

呼為義士為人赴急難往往陷刑死所以馬援書殷勤  
戒諸子舉世賤清素奉身好華侈肥馬衣輕裘揚揚過  
閭里雖得市童憐還為識者鄙我本羈旅臣遭逢堯舜  
理位重才不克戚戚懷憂畏深淵與薄冰蹈之唯恐墜  
爾曹當憫我勿使增罪戾閉門斂蹤跡縮首避名勢名  
勢不久居畢竟何足恃物盛必有衰有隆還有替速成  
不堅牢亟走多顛躓灼灼園中花早發還先萎遲遲澗  
畔松鬱鬱含晚翠賦命有疾徐青雲難力致寄語謝諸

郎躁進徒為耳

宋文鑑

王溥

溥字齊物并州祁人漢乾祐中進士為祕書郎  
周廣順初拜端明殿學士恭帝嗣位官右僕射  
宋初進位司空加太子太師封祁國公卒贈侍  
中諡康獻有集

石林詩話五代王仁裕知貢舉王丞相溥為狀  
元時年二十六後六年遂相周世宗猶及本朝  
以太子太保罷歸班年才四十二前此所未有  
也初溥拜相仁裕致仕無恙以詩和之云一戰

文場拔趙旗便調金鼎佐無為白麻驟降恩何  
極黃髮初聞喜可知跋敕案前人到少策沙隄  
上馬歸遲立班始得遙相見親洽爭知未貴時

### 謝進士張翼投詩兩軸

清河詩客本賢良惠我新吟六十章格調宛同羅給事  
功夫深似賈司倉登山始覺天高廣到海方知浪渺茫  
好去蟾宮是歸路明年應折桂枝香

洛陽搢紳舊聞記

### 詠牡丹

棗花至小能成實桑葉雖柔解吐絲堪笑牡丹如斗大

不成一事又空枝

歷代吟譜

趙晉

晉字則平幽州薊人占籍洛陽周顯德初永興  
軍節度從事宋乾德中拜門下侍郎平章事太  
平興國中及端拱初凡三入相薨以佐命功追  
封真定王諡忠獻配饗太祖廟庭有集

雪中駕幸敝廬恭紀

貞元重數莢滕六劇霏葩漠漠初濡砌皚皚欲聚沙問



閤銀作界宮闕玉為家調鼎慙鹽撒霑溫覺絮加瑞凝  
三殿瓦欣動五雲車冰柱撐茅屋瓊枝擁翠華微行停  
蹕警冷漏靜街譁具野曾無隗磻溪豈問牙公然門駐  
輦那信室盤蝸積素堪麟畫飛黃想兔置一庭看素練  
十道趣宣麻戎索籌先後雄才辨等差神威殷地軸御  
指落天花素臥甘朝穩褒功敢夜誇雪山行獻瑄早晚  
列星槎

陸氏善鳴集

鷄按此詩出近人陸氏次雲選本不知其何所  
據且殷字是宣祖廟諱普不應犯姑存之以俟

考

李昉

昉字明遠深州饒陽人漢乾祐中舉進士周顯  
德中仕至翰林學士入宋歷翰林侍讀學士拜  
中書侍郎平章事以特進司空致仕卒贈司空  
諡文正有集

贈賈黃中

賈以七歲應童子舉

七歲神童古所難賈家門戶有衣冠十人科第排頭上

五部經書誦舌端見榜不知名字貴登筵未識管弦歡  
從今穩上青雲去萬里誰能測羽翰

聞見前錄

寄孟賓于

幼攜書劍別湘潭金榜標名第十三昔日聲塵喧洛下  
近年詩價滿江南長為邑令情終屈縱處曹郎志未甘  
莫學馮唐便休去明君晚事未為慚

馬令南唐書賓于歸南唐為塗陽令黷貨當死  
時李昉事皇朝為翰林學士乃賓于同年進士  
聞賓于縲紲以詩遺之後主見詩貸之復其官

仙客

胎化仙禽性本殊何人攜爾到京都因加美號為仙客  
稱向閒庭伴野夫警露秋聲雲外遠翹沙晴影月中孤  
青田萬里終歸去暫處雞羣莫歎吁

青箱雜記昉所畜五禽名五客仙客鶴雪客鷺  
閒客白鸛隴客南客孔雀西客鸚鵡有詩云

御書飛白玉堂之署四字頒賜禁苑今懸挂已畢

輒述惡詩一章用歌盛事

玉堂四字重千金宸翰親揮賜禁林地望轉從今日貴

君恩無似此時深宴回上苑花初發麻就中宵月未沈  
衣惹御香拖瑞錦筆宣皇澤灑春霖院門不許閒人入  
承旨學士舉舊事置鈴索  
於院門閒人不許輒入  
仙境寧教外事侵我直承明

踰二紀臨川實動羨魚心

昉頃在禁林前後出處凡二十有五載不逢今日之盛事

者有七新學士謝恩日賜襲衣金帶寶鞍名馬一也十  
月朔改賜新樣錦袍二也特定草麻例物三也改賜內  
庫法酒四也月俸並給見錢五也特給親事官隨從六  
也新學士謝恩後就院賜宴設雖為舊事而無此時供  
帳之盛七也凡此七事並前例特出異恩以見聖君待  
文臣之優厚也臨川之美其在茲乎  
翰苑羣書

### 贈襄陽妓

峴山亭畔紅妝女小筆香牋善賦詩顏貌共推傾國色  
篇章皆是斷腸辭便牽魂夢從今日得見嬋娟在幾時  
千里關河萬重意夜深無睡暗尋思

能改齋漫錄

禁林春直

疎簾搖曳日輝輝直閣深嚴半掩扉一院有花春晝永  
八方無事詔書稀樹頭百轉鶯鶯語梁上新來燕燕飛  
豈合此身居此地妨賢尸祿自知非

瀛奎律髓

句

奠玉五回朝上帝御樓三度納降王

昌陵挽詩  
代吟譜

歷水

光先見月露氣早知秋

古今詩話

### 王易簡

易簡字國寶萬年人梁乾化中進士官右拾遺  
後唐拜中書舍人周廣順初歷禮刑兵三部尚  
書入宋召加少傅卒

宋史本傳後唐明宗即位易簡退居華陰作小  
隱詩二十首以見志好事者多傳誦

### 拜拾遺辭官歸隱作

汨沒朝班媿不才誰能低折向塵埃青山得去且歸去  
官職有來還自來

歷代吟譜

陶穀

穀字秀實邠州新平人本唐彥謙之孫避晉諱  
改焉仕晉知制誥倉部郎中仕漢為給事中仕  
周至兵部侍郎翰林承旨入宋加戶部尚書贈  
右僕射有清異錄行世

畫墁錄太祖嘗謂陶穀一雙鬼眼  
細素雜記周世宗時陶尚書穀奉使江南韓熙



載遣家妓奉盤匱及旦有書謝云巫山之麗質  
初臨霞侵鳥道洛浦之妖姬自至月滿鴻溝舉  
朝不能會其詞熙載因召家妓訊之云是夕適  
浣濯焉

國老談苑陶穀又嘗奉使兩浙獻詩二十韻於  
錢俶其末云此生頭已白無路掃王門時穀官  
是承郎職為學士奉命小邦獻詩已是失體復  
有掃門之句何辱命之甚也

### 題玉堂壁

官職須由生處有文章不管用時無堪笑翰林陶學士  
年年依樣畫葫蘆

續湘山野錄國初陶尚書以朝廷眷待詞臣不  
厚乞罷禁林太祖曰此官職甚難作依樣葫蘆

且作且作不許罷復不進用因題玉堂云云駕幸見之愈不悅卒不大用

東軒筆錄陶穀意希大用俾其黨因事薦引言穀在詞禁宣力實多太祖笑曰翰林草制皆檢前人舊本改換詞語所謂依樣葫蘆耳

### 寄贈夢英大師

是箇碑文念得全聰明靈性自天然離吳別楚三千里  
入洛遊梁二十年負藝已聞喧世界高眠長見臥雲煙  
相逢與我情何厚問佛方知宿有緣

夢英大師詩碑

書史會要釋夢英號臥雲叟南岳人與郭忠恕同時習篆皆宗李陽冰有所書偏傍字源及集

十八體書刻石于長安文廟

曹翰

翰大名人周世宗時仕至德州刺史入宋歷威  
塞軍節度使判潁州坐事削官終左千牛衛上  
將軍卒贈太尉淳化中賜諡武毅

內宴奉詔作

三十年前學六韜英名嘗得預時髦曾因國難披金甲  
不為家貧賣寶刀臂健尚嫌弓力軟眼明猶識陣雲高

庭前昨夜秋風起羞睹盤花舊戰袍

青箱雜記曹翰嘗平江南有功後歸環衛數年  
不調一日內宴賦詩翰以武人不預乃自陳曰  
臣少亦學詩亦乞應詔太宗笑而許之曰卿武  
人宜以刀字為韻翰援筆立進太宗覽之惻然  
即自環衛驟遷數級

張昭

昭字潛夫濮州范縣人歷仕唐晉漢周四朝至  
兵部尚書恭帝封舒國公宋初拜吏部尚書進  
封鄭國公致仕封陳國公卒有嘉善集

夜吟竇鞏集追思夷門題處已三稔矣悽然感興

書之

往歲記時梁苑夜今宵題處洛城秋  
浮生瞥電人何在  
懷舊傷心淚迸流  
三徑竹風鄰笛怨  
一庭霜月井梧愁  
妻兒未會予惆悵  
只怪燈前不舉頭

北海王崧跋云余家藏和峴所校五竇詩世少其本  
和所跋甲子歲乾德二年也祕監尹公者尹拙也  
致政大夫者吏部尚書致仕張昭也昭字潛夫  
題鞏詩一篇稱潛夫者即昭也刑部員外郎  
兼太常和者即峴也

符彥卿

彥卿字冠侯陳州宛邱人後唐中書令存審之  
子仕為慶州刺史入晉歷武寧軍節度同平章  
事漢乾祐中加中書令封魏國公周世宗改封  
魏王歸宋加守太師移鳳翔節度

知汴州作

全軍十萬擁雄師正是酬恩報國時汴水波濤喧鼓角  
隋隄楊柳拂旌旗前驅紅旆關西將環坐青蛾趙國姬

為報長安冠蓋道麤官到底是男兒

劉斧青瑣高議大丞相李公昉嘗言當日目外  
鎮為麤官符彥卿知汴州有詩云云公之詩意  
蓋有憾之詞爾

盧多遜

多遜懷州河內人周顯德中舉進士累官集賢  
殿修撰入宋知制誥為翰林學士歷中書侍郎  
平章事坐事謫崖州

荅塘詩話丁晉公謂曰盧相多遜在朝行將歷  
代帝王年歷功臣事迹天下州郡圖誌理體事

務沿革典故括成一百二十絕詩以備應對由是太祖太宗每所顧問無不知者以至踐清途登釣席皆此力耳

新月應制

太液池邊看月時  
好風吹動萬年枝  
誰家玉匣開新鏡  
露出清光些子兒

後山詩話太祖夜幸後池對新月置酒召使賦詩請韻曰些子兒其詩云云太祖大喜盡以坐間飲食器賜之

李 濤



濤字信臣京兆萬年人唐郇王瑋十一世孫避  
地湖南馬殷署衡陽令後唐天成初舉進士仕  
晉為中書舍人仕漢拜中書侍郎平章事周封  
莒國公入宋拜兵部尚書卒贈右僕射

春社日寄李學士

社翁今日沒心情為乏治顰酒一瓶惱亂玉堂將欲徧  
依稀巡到第三廳

李文正公談錄吾為翰林學士月給內醢兵部  
李相濤好滑稽嘗因春社寄此詩蓋俗傳社日

酒弊治耳聾兵部小字社翁每於班行呼其名  
字云

句

溪聲長在耳山色不離門  
埽地樹留影拂牀琴有聲

落日長安道秋槐滿地花  
唐撫言

楊昭儉

昭儉字仲寶京兆長安人後唐長興中進士殿  
中侍御史事晉為翰林學士周改御史中丞宋  
開寶初以工部尚書致仕太宗即位加禮部尚

書卒

贈夢英大師

紀贈歌詩數百人序師多藝各求新未言篆隸飛龍鳳  
且說風騷感鬼神琴有古聲清耳目鶴無凡態惹埃塵  
英公所學還如此不錯承恩近紫宸

夢英大師詩碑

趙逢

逢字常夫媯州懷戎人漢乾祐中擢甲科授祕  
書郎周顯德中水部郎中知制誥入宋拜中書

舍人乾德初充樞密直學士開寶中卒

懷夢英大師

林巒影裏有清賢與我相知二十年書札愛工精玉篆  
利名拋捨住金田吟容賈島稱詩匠醉許劉伶作酒仙  
別後近聞棲華嶽亂雲應得恣情眠

夢英大師詩碑

王著

著字成象單州單父人漢乾祐中進士仕周為  
金部郎中知制誥宋初加中書舍人翰林學士

卒

贈夢英大師

到處聞人乞篆蹤學來年久有深功墨池闊類湘江水  
筆冢高齊太華峯金錫罷飛新解虎鐵盃收掌舊降龍  
知師吟戀烟村景不肯回頭望九重

夢英大師詩碑

許仲宣

仲宣字希粲青州人漢乾祐中進士宋初授太  
子中允太宗朝知河南府

清洛喜英公大師相訪

方袍紫染出彤庭久在林泉養性靈無事撓心長見醉  
有名傳世不曾醒多年別我頭先白此日逢師眼倍青  
記得上都相會否夜飛杯篆老君經

夢英大師詩碑

蘇德祥

德祥宋初官右補闕內供奉

贈南嶽宣義大師英公

學就書聞在道林幾年辛苦用身心九霄雨露酬知早

百首風騷立意深青白野雲閒裏臥古今碑碣醉中尋  
因何負此多般藝可惜教師鬢雪侵

夢英大師詩碑

### 趙文度

文度宋初官鎮國軍節度使

### 贈夢英大師

攜筇何日別長沙鳳篆功夫世所嘉秦嶺夜吟殘海月  
章臺春講雨天花淨餅遠貯湘潭水片衲晴披嶽面霞  
聖主有恩酬絕藝簾前師號紫袈裟

夢英大師詩碑

郭從義

從義其先沙陀部人父紹古事後唐武皇賜姓  
李氏從義補內職晉天福初復姓郭歷事四朝  
周世宗時以功加檢校太師兼中書令宋初為  
河中尹護國軍節度使致仕卒

贈夢英大師

雲水僧來說我師換鵝書札轉高奇揮毫傳下千年事  
貞石曾留幾處碑混俗市廛人莫識和光蹤跡鶴應知



蓮花結社須容我不似陶潛愛酒卮

夢英大師詩碑

何承裕

承裕宋初官侍御史

寄宣義英公

書札精奇已換鵝仍聞依舊臥烟蘿詩成萬首猶嫌少  
酒飲千鍾不怕多鄉寺夜開雲夢月石房寒鎖洞庭波  
知師收拾南歸去為憶漁人唱楚歌

夢英大師詩碑

賈玘

玳宋初官尚書兵部郎中

寄贈宣義大師

篆寫千文邁古今感陶承旨撰碑陰兩朝雨露書中得  
滿篋詩章物外尋衡嶽水雲長挂夢帝城烟月不關心  
西遊去後無消息想共陳搏一處吟

夢英大師詩碑

李鑄

鑄宋初官檢校禮部尚書守太常卿致仕

贈英公大師

僧門奇士有英公篆隸高能世莫窮  
五色彩毫傳夢寐三乘真諦達虛空  
賜衣深染函關上寵號光呼柰苑中  
幸對風情添逸趣好陪清話在蓮宮  
夢英大師詩碑

師頌

顏宋初官翰林學士尚書刑部郎中知制誥史  
館修撰

贈宣義大師英公

禪得元機筆得精孤雲光彩甚分明  
毫端落紙堪為寶

海內無人不重名  
山約終歸雙履在  
髭因涼剃一刀輕  
何妨換取鵝羣了  
却與迷徒指化城

夢英大師詩碑

李若拙

若拙宋初官左諫議大夫

贈宣義大師英公

昔歲高名動九重  
衡山別後碧雲空  
紫袍親授龍墀上  
白足頻登虎殿中  
小篆每輕秦相法  
隸書猶鄙晉臣功  
多才多藝如師少  
當世羣賢盡嚮風

夢英大師詩碑

梁周翰

周翰字元褒管城人周廣順二年進士開寶中  
為太子中允太平興國中知蘇州召為翰林學  
士終工部侍郎有集

禁林讌會之什

寶書驚絕耀天章飛白親題賜玉堂瑞彩上騰流素月  
朗河下注映丹牆鶴盤吳嶼雙翎健鵲顧雕陵巨翼長  
遊霧半收懸組練輕雲斜拂駐鸞皇墨池併獲三奇寶

翠琰俱生五色光陪讌禁林知有幸叩頭遙祝萬年觴

翰苑羣書

句

百花將盡牡丹坼十雨初晴太液春

玉壺野史

韓浦

浦一作溥長安人唐相休之後少俊敏善屬文宋

初舉進士官司門郎中

東都事畧溥博學多知唐朝氏族與人談娓娓可聽號為近世肉譜縉紳頗推之

以蜀箋寄弟洎

十樣蠻牋出益州寄來新自浣溪頭  
老兄得此渾無用助爾添修五鳳樓

楊文公談苑韓浦與弟洎皆有辭藻洎語人曰  
吾兄為文譬如繩樞草舍聊避風雨予之為文  
是造五鳳樓手浦以蜀箋寄之云云

奉揚英公大師詩匠

悟解真空始壯年兩朝供奉近爐烟  
故鄉夢斷三湘遠應制詩高四海傳  
晴望野雲生紫閣夜吟蘭燭滴花牋

應愁內殿徵書至恐向東林負昔緣

夢英大師詩碑

周渭

渭字得臣昭州恭城人建隆初召試賜同進士  
出身歷官兩浙東西路轉運使遷侍御史加職  
方員外郎

贈道士吳崇岳

楮為冠子布為裳吞得丹霞壽最長  
混俗性靈常樂道出塵風格早休糧  
枕中經妙誰傳與肘後方新自寫將



百尺松梢幾飛步鶴棲枝上禮虛皇

郡閣雅談吳崇岳泉州龍興觀道士辟穀多年  
嘗登松梢禮拜處松枝可六七十尺福建漕使  
周渭贈以詩太平興國中詔入京

宋 白

白字太素一字素臣開封人建隆二年進士太  
宗擢為左拾遺權出知兗州改翰林學士與李  
昉等奉詔纂文苑英華太平御覽歷刑部尚書  
致仕卒贈左僕射諡文安有廣平集

贈麻仲英

宣毫歛墨川牋紙寄與麻家小秀才七歲能文天骨異  
前生已折桂枝來

皇朝類苑麻仲英幼有俊才七歲能詩侍父官  
鄜州宋翰林白方謫鄜州而召之坐中賦詩十  
篇宋大稱賞翌日宋以浣溪牋李廷珪墨諸葛  
氏筆遺之仍贈以詩云云

中酒

中酒事俱妨偷眠就黑房靜嫌鸚鵡鬧渴憶荔枝香病  
與慵相續心和夢尚狂從今改題品不號醉為鄉

老學  
菴筆

記

宮詞

并序

宮中詞名家詩集有之皆誇帝室之輝華敘王遊之壯觀挾彤庭金屋之思道龍舟鳳輦之嬉然而萬乘天高九重淵邃禁衛嚴肅乘輿至尊亦非臣子所能知所宜言也至於觀往迹以緣情採新聲而結意鼓舞昇平之化揄揚嘉瑞之徵於以示箴規於以續騷雅麗以有則樂而不淫則與夫瑤池粉黛之詞玉臺

閨房之怨不猶愈乎是可以鏘絲簧炳絃素使陳王  
三閣狎客色羞漢后六宮美人傳誦者矣援筆一唱  
因成百篇咏今則思繼頌聲述古則庶幾風諷也大雅  
君子其將莞然詞曰

樓前宣赦掣金雞大禮新成彩仗歸萬歲聲高天地喜  
慶雲飛上袞龍衣

龍腦天香撒地衣錦書新冊太真妃宮官一夜鋪黃道  
卻踏金蓮步步歸

春宵宮女著春綃鈴索無風自動搖  
畫下珠簾獨子睡  
紅蕉窠下對芭蕉

微雲點月漢宮秋水殿疎螢黑處流  
鳳管不調慵進曲  
卻排銀燭夜藏鉤

玉殿金扉夜不扃露華如水照圓靈  
昭陽女伴新承寵  
心祝君王拜壽星

去年因戲賜霓裳權戴金冠奉玉皇  
久著淡黃心覺厭  
春來不敢便紅妝

金堂曲  
讌夜厭厭仙樂聲清御酒黏不用司宮排蠟燭  
海人新貢夜明簾

紅箋一幅卷明霞  
纖手題詩寄大家  
檀口微吟繞廊柱  
濛濛春雨濕梨花

十家宮詞

一春

一春情調淡悠悠  
閒倚書窗背小樓  
暖日只添中酒睡  
晚風頻動惜花愁  
鶯衝舞蝶侵人過  
絮逐天絲觸處遊  
已為韶光發惆悵  
可堪家近白蘋洲

詩林萬選

句

回眸已覺三山近滿壁潛驚五月寒

玉堂賦董羽畫  
宣和畫譜吉

音來碧落帖子報紅牋清夜驚神王隴明到省前風中

宮漏盡日出榜繩懸

追念策名時作

陸放翁題跋

安鴻漸

鴻漸洛陽人生宋初

庶齋老學叢談李慶孫有文名時謂洛陽才子  
安鴻漸天下文章李慶孫

題楊凝式書

端州石硯宣城管王屋松烟紫兔毫更得孤卿老書札  
人間無此五般高

洛陽搢紳舊聞記

畢士安

士安字仁叟代州雲中人乾德四年進士真宗  
朝與寇準同拜中書門下平章事卒贈太傅諡

文簡

禁林讌會之什

好文英主古難齊寵重辭臣意勿低  
睿藻清新刊翠琰



神蹤飛動在璇題。芸籤許效蓬萊閣。花檻容模罨畫溪。  
樂聖朋儕開綺席。愛君誠抱挂金閨。買臣晚遇知多幸。  
犬子端憂思轉稽。天地恩私無以報。只將兢慎對芝泥。

翰苑羣書

楊照承議蘆雁枕屏

畫師不肯傳風蜨。故作枯乾逞奇絕。清秋未合結繁陰。  
深戶何從灑飛雪。雪裏鴨兒苦耐寒。眠沙枕浦白雲團。  
黃蘆槭槭枝葉乾。江頭鳴雁恰飛起。恍如身到瀟湘閒。

瀟湘洞庭雲水隔山頭坡陀斷行客從來冬景畫已難  
況有翎毛似崔白已覺冰漫稻梁少更疑水宿溪垠窄  
生平有道付滄洲今日牀頭動行色屏風主人家近遠  
我昔曾過潯陽縣田蘆野雁嘗親見出門解榻定相逢  
借我家鄉令對面

聲畫集

答王黃門寄密蒙花

多病眼昏書嬾讀煩君遠寄密蒙花愁無內史兼詞翰  
為寫真方到海涯

柳亭詩話畢文簡此詩其孫將叔注云家有唐人所摹十七帖來禽等四物外又有密蒙花詩一種黃長睿謂書法要錄並未載此事不知何緣畢氏有之楊升菴謂此花可以染紙引晉武帝以大秦獻三萬賜杜預寫春秋釋例則所云真方者染方也

### 李九齡

九齡洛陽人乾德五年進士第一

曰琯按洪邁萬首絕句誤

作唐人

### 贈馬道士

水共逍遙雲共孤  
混時言笑只佯愚  
經年但醉宜城酒

千里唯擔華嶽圖尋野鶴來空碧洞覓琴僧去渡重湖  
人閒再見知何日乞取先生石轆轤

瀛奎律髓

贈譚先生

古觀重重繞翠微松杉深處掩雙扉雲生萬壑投龍去  
海隔三山放鶴歸花洞宴遊春日永石壇朝禮曙星稀  
每聽高論長生理擬向寰中便拂衣

過相思谷

悠悠信馬春山曲芳草和烟鋪嫩綠正被離愁著莫人

那堪更過相思谷

山中寄友人

亂雲堆裏結茅廬已共紅塵跡漸疎莫問野人生計事

窗前流水枕前書

以上宋藝圃集

上清辭

樓鏤彤霞地絕塵碧桃花發九天春東皇近日慵遊宴  
閒殺瑤池五色麟

旅舍臥病

家隔西秦無遠信身隨東洛度流年病來旅館誰相問

牢落閒庭一樹蟬

以上萬首唐人絕句

柴成務

成務乾德六年進士第一太宗朝官司封郎中

知制誥

禁林讌會之什

內署延賓宴玉堂紫闥深啟會琳琅雲霏寶額題宸翰  
金錯瑤編勒御章盤薦異羞羅彩翠盞傾醇醴湛清光

柳當朱檻春先到日過花甌影漸長吟客盡容窺綺閣  
棲禽應許託雕梁歡榮共樂文明代惟願登歌頌聖皇  
翰苑羣書

孫光憲

光憲字孟文貴平人仕荆南高從誨為書記歷  
檢校祕書監兼御史大夫嘗勸繼沖獻三州地  
宋太祖授黃州刺史乾德中卒有荆臺集筆傭  
集橘齋集北夢瑣言

竹枝詞

門前春水白蘋花岸上無人小艇斜  
商女經過江欲暮散拋殘食飼神鴉

楊柳枝詞

閭門風暖落花乾飛徧江城雪不寒  
獨有晚來臨水驛閒人多凭赤闌干

採蓮曲

菡萏香銷十頃陂小姑貪戲采蓮遲  
晚來弄水船頭濕



更脫紅裙裏鴨兒

以上全唐詩

句

曉廚烹淡菜春杼織橦花

北夢瑣言僕早歲嘗和南越詩云云牛翰林覽而絕倒莫諭其旨牛公曰吾子只知名安知淡菜非雅物也

王紳

紳一作伸

乾德中以左補闕知永州

虎邱

山頭古寺多陳迹故國空餘氣象雄霸業已隨流水去

闔閭墳草又西風

吳郡志

留題浯溪

湘川佳致有浯溪元結雄文向此題想得後人難以繼

高名常與白雲齊

零陵總記

歐陽詹

詹乾德中獻野史授黃岡宰

公字蘆

漁家合得兩三莖公退徐吟思倍清官滿不將歸舊隱  
蕭蕭留與後人聽

句

橫琴遮遠洞舉手出高峯

臥屏

以上雅言雜載

耿仙芝

仙芝大名進士

句

淺水短蕪調馬地淡雲微雨養花天

歷代吟譜

譚用之

用之字藏用五代末人入宋

宋史文苑傳開寶初有穎贇董淳劉從義善為文章張翼譚用之善為詩張之翰善箋啟贇拔萃科至太子中允淳為工部員外郎直史館奉詔撰孟昶紀事從義多藏書嘗續長安碑文為遺風集二十卷餘皆官不達

贈索處士

不將桂子種諸天長得尋君水石邊  
玄豹夜寒和霧隱  
驪龍春暖抱珠眠  
山中宰相陶弘景洞裏真人葛稚川

一度相思一惆悵  
水寒烟澹落花前

感懷呈所知

十年流落賦歸鴻  
誰傍昏衢駕燭龍  
竹屋亂烟思梓澤  
酒家疎雨夢臨邛  
千年別恨調琴轆  
一片年光覽鏡慵  
早晚休歌白石爛  
放教歸去臥羣峯

秋宿湘江遇雨

江上陰雲鎖夢魂  
江邊深夜舞劉琨  
秋風萬里芙蓉國  
暮雨千家薜荔村  
鄉思不堪悲橘柚  
旅遊誰肯重王孫

漁人相見不相問長笛一聲歸島門

以上全唐詩

柳開

開字仲塗大名人初慕韓愈柳宗元為古文名  
肩愈字希元後改焉開寶六年進士第歷官環  
邠曹代忻滄六州終如京使自號東郊野夫又  
曰補亡先生有河東集

諷虞嬪詩

并序

湘水導全州城下北走州之境又獨能產筠竹成紋

古書今俗通謂舜二妃溺于沅湘揮淚為竹斑者此  
也復東西望九疑山纔可百數里州岸佛寺旁有妃  
廟因諷妃事作七言十九句詩一章刻石留于妃廟  
中

惟堯則天舜弗復誕妃罔極恩膏育過密無聞血盈目  
南巡胡為淚染竹父輕夫重當何淑沅湘岸筠烟萋覆  
凝紋疊斑殷郁郁猿緣鼯號鉤輈宿朋悽助惋聲幾哭  
賸疑下憂禹湮瀆功充民戴荷百祿重暉並曜難停轂

元居不寧逝如逐悲帝負冤生莫卜卒顛沈瀾遠昌族  
謳訟肇私歸永福柔陰慘刻咎深速前睇九山排矗矗  
到今雲顏愁可掬

柳河東集

塞上曲

鳴鶻直上一千尺天靜無風聲更乾碧眼羌人三百騎  
盡提金勒向雲看

倦遊雜錄馮太傅端嘗書此詩顧坐客曰此可  
畫于屏障

楚南樓



洗盡蠻烟几案空  
登臨直見楚山雄  
坐當鴻鵠高飛處  
身在乾坤灝氣中  
木落有情瞻北闕  
霜輕無夢入西風  
凭闌自是蓬瀛客  
獨對瀟湘興未窮

顧氏積書齋選

張觀

觀開寶中左司諫

過衡山留贈廖融

未向漆園為傲吏  
定應明代作徵君  
傳家奕世無金玉  
樂道經年有典墳  
帶雨小舟橫別浦  
隔花幽犬吠深雲

到頭終為蒼生起休戀耕烟楚水濱

郡閣雅談

劉能

能開寶中官左補闕

句

窗外秋聲湘瑟怨檻前竹色楚帆飛  
嬾向九疑歧路望

渡頭雲雨正霏霏

奉詔九疑留題祁陽縣白沙驛亭  
零陵總記

王嗣宗

嗣宗字希阮汾州人開寶八年進士第一太宗

朝累官淮南轉運使真宗朝為樞密副使以大  
同軍節度知許州徙知陝州召還以左屯衛上  
將軍檢校太尉致仕卒贈侍中諡景莊

玉照新志開寶八年廷考王嗣宗與陳識齊納  
卷藝祖命二人角力以爭之而嗣宗勝焉遂居  
第一以識為第二

行營雜錄王嗣宗守邠土邠舊有狐王廟相傳  
能為人禍福歲時享祀祈禱不敢少怠嗣宗至  
郡集諸邑獵戶得百餘人以甲兵圍廟薰灌其  
穴殺百餘狐其妖遂息嗣宗後帥長安處士种  
放者朝廷所尊禮每帥守至輒面數之嗣宗不  
服以言拒之放責數嗣宗聲色俱厲嗣宗怒以  
手批其頰先是真宗有敕書令放有章奏即附

驛欲詣闕即乘驛放遂乘驛訴于上前上特于  
嵩山之陽置書院以處之後嗣宗去郡有人贈  
詩曰終南處士威風減渭北狐妖窟穴空嗣宗  
大喜歸告其子孫曰吾死更勿為碑誌但石刻  
此詩置于墓旁吾其榮矣

題關右寺壁

欲挂衣冠神武門先尋水竹渭南村卻將舊斬樓蘭劍  
買得黃牛教子孫

東坡跋云余舊見此詩于關右寺壁上愛之不  
知其何人作也蔡寬夫詩話云是王嗣宗詩

劉兼

兼長安人官榮州刺史詩一卷

胡震亨云雲間朱氏得宋刻唐百家詩兼集中有長春節詩為宋太祖誕節其人蓋五代人而入宋者

秋夕書事

搖落江天萬木空  
雁行斜戛塞垣風  
征閨擣月離愁遠  
舊館眠雲旅夢通  
郢客豈能陪下里  
臯禽爭肯戀樊籠  
此心曠蕩誰相會  
盡在南華十卷中

咸陽懷古

高秋咸鎬起霜風秦漢荒陵樹葉紅七國鬪雞方賈勇  
中原逐鹿更爭雄南山漠漠雲常在渭水悠悠事旋空  
立馬舉鞭遙望處阿房遺址夕陽東

江樓望鄉寄內

獨上江樓望故鄉淚襟霜笛共淒涼雲生隴首秋初早  
月在天心夜正長魂夢只能隨蛺蝶烽烟無計學鴛鴦  
蜀箋都有三千幅總寫離情寄孟光

長春節

聖朝佳節遇長春。跪奉金爐祝。又焚寶藏發來天地秀。  
兵戈銷後。帝皇尊太平。基址千年永。混一車書萬古存。  
更有馨香滿芳檻。和風遲日在蘭蓀。  
以上唐音戊籤

李至

至字言幾。真定人。舉進士。太平興國中為翰林  
學士。拜參知政事。兼祕書監判國子監。真宗朝  
拜工部尚書知河南府。卒。贈侍中。

伏蒙承旨學士特贈寵招。慙非嘉客。陪列仙于丹

地觀盛事於玉堂御題禁署之名勢如飛動聖制  
大風之作鏗若宮商一時併耀于蓬瀛三體互成  
于真草昔太宗之優待學士日預論思明皇之寵  
尚集賢時聞臨幸以今況昔異代同榮至謬亞冢  
卿獲司中祕啗牛心而不稱陪塵尾以何闕二街  
樂聖之杯且乏娛賓之賦嗟嘆不足歌詠輒興雖  
勞燥吻之冥搜終類擊轅之陋唱仰塵高鑒聊抒  
下情吏部侍郎兼祕書監李至上



昔陪羣彥在鰲山今日重來赴玳筵纔向玉堂觀聖札  
又離瑤席覩宸篇二南絕唱人驚駭三體神蹤鳳折旋  
坐久庭柯移午影飲酣宮吹遞香烟吟求視草牋分寫  
醉假通中枕暫眠俗客不知仙禁近高歌共樂太平年

翰苑羣書

呈修史錢侍郎桃花犬歌

宮中有犬桃花名絳繒圍頸懸金鈴先皇為愛馴且異  
指顧之間知上意珠簾未卷扇未開桃花搖尾常先至

夜靜不離香砌眠朝飢祇傍御牀餽彩雲路熟不勞牽  
瑤草風微有時吠無何軒后鑄鼎成忽遺弓劍棄寰瀛  
迢迢松闕伊川上遠逐龍輜十數程兩皆漣漣似流淚  
骨見寒毛頓顚顚萬人見者俱傷心微物感恩猶若是  
韓盧備獵何足嘉西旅克庭豈為瑞聞君奉詔修實錄  
一字為褒應不曲白魚赤雁且勿書願君書此懲浮俗

古今詩話淳化中合州貢桃花犬甚小而性急  
常馴擾于御牀之側每坐朝犬必先吠人乃肅  
然太宗不豫此犬不食及上仙號呼涕泗瘦瘠  
章聖諭以奉陵即搖尾飲食如故詔造大鐵籠

施素衲置鹵簿中行路見者流涕李至作歌以  
寄史官錢若水

宋史錢若水傳太宗畜犬甚馴常在乘輿左右  
及崩鳴號不食因送永熙陵李至嘗詠其事欲  
若水書之以戒浮俗若水不從

## 黃台

台歙人遷宣城宋初任屯田員外郎

題歙州問政山聶道士所居

千尋練帶新安水萬仞花屏問政山自少雲霞居物外  
不多塵土到人間壺懸仙島吞舟罷椀浸星宮沈水閒

寶籙篋垂金縷帶絳囊繚鎖玉連環靜張碁勢鋪還打  
默考仙經補又刪牀並葛輶雙兔伏窗橫檉几老龍跼  
溪童乞火朝敲竹山鬼聽琴夜撼櫟草暗碧潭思句曲  
松昏紫氣度深關龜成淺甲毛猶綠鶴化幽翎頂更殷  
阮洞神仙分藥去蔡家兄弟寄書還黃精苗倒眠青鹿  
紅杏枝低挂白鷗容易煮茶供客用辛勤栽果與猿攀  
常尋靈穴通三島擬過流沙化百蠻新隱漸開侵月窟  
舊林猶恍枕沙灣手疏俗禮慵非傲肘護靈方祕不慳

海上使頻青鳥點篋中藏久白驢頑筇枝健拄菖蒲節  
筍櫛高簪玳瑁斑花氣熏心香馥馥澗聲冷耳響潺潺  
高墳自掩浮生骨短晷難窮不死顏早晚重逢蕭塢客  
願隨芝蓋出塵寰

茗溪漁隱叢話

方輿勝覽唐有于方外者自荆南掌書記棄妻  
從太白山道士學養氣之術後弟德晦為歙州  
刺史方外來訪之德晦為築臺于此號問政山  
房縣人聶師道少師方外後入吳為國師號問  
政先生

## 呂端

端字易直幽州安次人以蔭補千牛備身在周  
為直史館歸宋遷太常丞淳化四年拜參知政  
事擢戶部侍郎同中書門下平章事真宗即位  
除太子太保卒贈司空諡曰正

贈李公

憶昔僦居明德坊官資俱是校書郎青衫共直昭文館  
白首同登政事堂佐國廟謨君已展避賢榮路我猶妨  
主恩至重何時報老眼相看淚兩行

青箱雜記李昉呂端同薦文館各登台輔呂公  
贈詩云云

送英公大師歸終南

衡岳烟蘿紫閣雲名高湖外晚遊秦清詞古學儒生業  
圓笠方袍釋子身竹杖拄歸山裏寺篆書留與世間人  
我疑簪組成爲縛空仰吾師去路塵

夢英大師詩碑

范杲

杲字師回魯公質之姪太宗朝仕至右諫議大  
夫知濠州召爲史館修撰卒

寄宣義大師英公

西遊久不得師書  
覩物相思展篆圖  
情厚未忘蓮社約  
分深曾伴橘洲居  
青雲作陣宜長臥  
白酒資吟莫破除  
見說近來揮彩筆  
字皆飛動有功夫

夢英大師詩碑

句

千里版圖來浙右  
一聲金鼓下河東

澠水燕談藝祖收河東杲叩馬進詩云云增秩  
賜章服

楊徽之



徽之字仲猷浦城人南唐時閒道至汴中周顯  
德二年進士入宋除著作佐郎知全州太平興  
國初轉庫部員外郎判南曹詔編文苑英華真  
宗即位歷禮部侍郎樞密直學士兼祕書監咸  
平二年特置翰林侍讀學士命徽之與夏侯嶠  
呂文仲為之卒贈兵部尚書有集

禁林讌會之什

星移歲律應青陽得奉羣英集玉堂龍鳳雙飛觀御札

雲霞五色詠天章禁林漸覺清風暖仙界元知白日長  
詔出紫泥封去潤朝迴蓮燭賜來香二篇稱獎恩尤重  
萬國傳聞道更光何幸微才逢盛事願因史冊紀餘芳  
翰苑羣書

嘉州作

俗遇臘辰持藥獻吏逢荷月隔花參耆宿因來問封部

竹籬西畔是雲南

方輿勝覽

漢陽晚泊

傍橋吟望漢陽城，山徧樓臺徹上層。  
犬吠竹籬沽酒客，鶴隨苔岸洗衣僧。  
疎鐘未徹聞寒漏，斜月初沈見遠燈。  
夜靜鄰船問行計，曉帆相與向巴陵。

寒食寄鄭起侍郎

清明時節出郊原，寂寂山城柳映門。  
水隔淡烟脩竹寺，路經疎雨落花村。  
天寒酒薄難成醉，地迴樓高易斷魂。  
回首故山千里外，別離心緒向誰言。

贈譚先生

古觀重重遠翠微杉松深處掩雙扉雲生萬壑投龍去  
海隔三山放鶴歸花洞宴遊春日永石壇朝禮曙星稀  
每聽高論長生理擬向塵中便拂衣

以上瀛奎律髓

句

犬吠竹籬沽酒客鶴隨苔岸洗衣僧

江行

天寒酒薄難成

醉地迴樓高易斷魂

寒食

戍樓煙自直戰地雨長腥

塞上

偶

題品石雲生筆閒遶庭松露濕衣

僧舍

新霜染楓葉皓月

借蘆花

湘江舟行

廢宅寒塘水荒墳宿草烟

哭江為

青帝已教

春不老素娥何惜月長圓 浮花水入瞿塘峽帶雨雲

歸越雋州

嘉陽川

春歸萬年樹月滿九重城

元夜

開盡菊花

秋色老落殘桐葉雨聲寒

宿東林

渾水燕談楊侍讀徽之太宗間其詩名盡索所  
著得數百篇奏御仍獻詩以謝卒章曰十年牢  
落今何幸叨遇君王問姓名上和之以詩謂宰  
臣曰真儒雅之士操履無玷拜禮部侍郎選集  
中十聯寫于御屏梁周翰詩曰誰似金華楊學  
士十聯詩在御屏風

古今詩話僧文瑩云必以天池皓露滌筆于冰  
甌雪碗中方與楊公此詩神骨相副

卞震

震成都人蜀進士為渝州判蜀平入宋仍舊職

句

雨壁長秋菌風枝落病蟬

即事

老筇搯瘦影寒木凭吟身

又

詩債到春無處避離愁因醉暫時無

春日偶題

茶香解睡

磨鐺煮山色牽懷著屐登

以上雅言系述

空囊萬里客斜月一

牀寒

歷代吟譜

孟貫

貫閩人

句

掃葉林風後拾薪山雨前

寄張山人草堂

詩話總龜閩嶺孟貫為性疎野不以名宦為意  
喜篇章大諫楊徽之稱之

竇儀

儀字可象薊州漁陽人晉天福中進士歷漢周  
二朝仕至兵部侍郎入宋拜翰林學士加禮部  
尚書卒贈右僕射

宋史本傳竇儀父禹鈞儀弟儼侃偁僖皆相繼  
登科馮道與禹鈞有舊嘗贈詩有靈椿一株老

丹桂五枝芳之句當時號實氏五龍

五朝名臣言行錄儀為性嚴重家法整肅每對客坐即二侍郎三起居四參政五補闕皆侍立焉

過邠州留題

多少樊籠不敢開強拘物性要相陪何時得似邠州守

德政臨民鶴自來

萬姓統譜龍鶴字琢成乾德初任邠州守有仁政一日羣鶴翔于公庭州民繪來鶴圖以頌其德時學士竇儀以使過邠留題云云

宋詩紀事卷二